

էր հայերի մէջ ազատութեան յոյսերը հրահրելու համար :

Դրա հետ միասին՝ Եկատերինան նաեւ ծրարագրել էր զբաւել Ղրիմի թերակղզին եւ Սեւ ծովի հիւսիսային ափերը : Դա՛ եւս Ռուսաստանի համար կենսական նշանակութիւն ունէր — ե՛ւ աշխարհակալական, ե՛ւ առեւտրա-տնտեսական, ե՛ւ Եւրոպային մօտենալու տեսակէտներէց :

Ուրիշ խօսքով՝ Ռուսաստանը հարկադրուած էր պատերազմներ մղելու թէ՛ Պարսկաստանի եւ թէ՛ Տաճկաստանի դէմ : Իսկ մի պատերազմ, որ մղուած էր Հայաստանի թշնամիներից մէկն ու մէկի դէմ, բաւական էր նորից ոգեւորելու հայերին եւ ազատութեան տենչը նրանց մէջ վառելու :

Կոլւնների յաջողութեան տեսակէտից հարկաւոր էր մէկ կողմից՝ այդ մահամեղական պետութիւնների ուշադրութիւնը պատերազմից հեռացնել եւ ուրիշ կողմ դարձնել. միւս կողմից՝ զբաւել նրանց քրիստոնեայ հպատակների համակրութիւնը եւ եթէ հնարաւոր է՝ մանաւանդ աջակցութիւնը :

Եկատերինան երկու պատերազմ ունեցաւ Տաճկաստանի դէմ, Ղրիմը եւ Սեւ ծովի հիւսիսային ափերը զբաւելու համար : Առաջինը՝ 1768-1774, իսկ երկրորդը՝ 1878-1791 :

Թէեւ վիճելի հողամասի իսկական տէրը Ղրիմի խանն էր, բայց որովհետեւ նա վասալական կախումն ունէր օսմանեան սուլթանից, ուստի Եկատերինան ստիպուեց դէնքն ուղղել Տաճկաստանի դէմ :

Միեւնոյն ժամանակ նա կարողացաւ վարպետօրէն սքողել իր նպատակները մէկ զեղեցիկ շղարդով : Օրինակի համար, Տաճկաստանի դէմ մղուող պատերազմների խնդրում նա հրապարակ ձեռք օսմանեան պետութեան քրիստոնեայ հպատակների ազատութեան հարցը : Դեռ աւելի. հրատարակեց մի կոչ, ուղղուած այդ ազգութիւններին, որպէսզի նրանք օգտուեն առիթից եւ ոտքի կանգնեն : Ուղարկեց մարդիկ (1769 թ.) Յունաստան, Սերբիա, Սեւ Լեռներ, Վրաստան — ապստամբութիւն քարոզելու եւ տաճիկների դէմ ոտքի հանելու :

Հայերն էլ Արեւելքում աչքի ընկնող ժո-

վուրդ էին եւ տաճկաց ու պարսից հպատակ : Հետեւապէս կայսրուհին չէր կարող նրանց աչքաթող անել նման պայմաններում :

Այդ իսկ պատճառով Եկատերինան եւս սկսում է առատ ու թովիչ խոստումներ շոյալել հայ ժողովրդին եւ զբանով բորբոքել մօտալուտ փրկութեան երազները :

Սանդալառութիւնն այնտեղ է հասնում, որ մինչեւ իսկ Սիմէոն Երեւանցու նման հեռատես եւ զգուշաւոր կաթողիկոսը, մօտիկ ապագայի զեղեցիկ հեռանկարով ոգեւորուած, արհամարհում է շահերի ու Երեւանի սարդարնների երկիւղը եւ անմիջական բանակցութիւններ սկսում Պետերբուրգի հետ : Թէեւ զրա իսկական շարժառիթը կրօնական-եկեղեցական էր, սակայն հետագայում, շատ շուտ՝ ով, նաեւ քաղաքական բնոյթ ստացան Էջմիածնի եւ ուրսաց կառավարութեան յարաբերութիւնները :

Ինչպէս յայտնի է, Աստրախանի (Հաշտարխան կամ Աժտարխան) հայերը վերջերս թօթափել էին Էջմիածնի իրաւասութիւնը եւ Գանձասարի կաթողիկոսների իշխանութեան ներքոյ մտել : Սիմէոն Երեւանցին, այդ բանից վշտացած, Դաւիթ վարդապետին պատուիրակութեամբ ուղարկում է Պետերբուրգ մի կոնգակով, որի մէջ կայսրուհուց խնդրում է. —

1. Որ Ռուսաստանում բնակուող բոլոր Լուսաւորչական հայերը, ինչպէս մինչեւ այժմ, այնպէս եւ ապագայում, ենթարկուեն Էջմիածնի իրաւասութեանը բոլոր հոգեւոր եւ եկեղեցական-վարչական գործերում :

2. Որ նրանց հովուող եպիսկոպոսը (Առաջնորդ) Էջմիածնից ուղարկուի եւ բոլոր ինքնակոչ հովիւների մուտքը Ռուսաստան՝ արգելուի, եւ

3. Որ Էջմիածնին այս մտքով մի բարձրագոյն հրովարտակ շնորհուի «ի նշան մշտական ողորմածութեան եւ ի յիշատակ բարեբախտ թագաւորութեան» :

Դաւիթ վարդապետի այս պատգամաւորութիւնը շատ լաւ ընդունելութեան արժանացաւ արքունիքում : Կայսրուհու հրամանով արտաքին գործոց Յանձնաժողովը յօրինեց մի հրովարտակ (30 Յուլիսի 1768 թ.) յանուն հայոց կաթողիկոսի եւ նոյն վարդապետի ձեռքով, մի